

#Use\_Your\_Voice

# English Learning Plan "Build & Think"



Waleed Essam





## ايه هي اللغة؟

ببساطة شديدة اللغة أداة تواصل يعنى شيء ربنا خلقه عشان الناس تفهم بعض بيه عشان لما حد يكلمك تفهمه و اما يسمعك يفهم انت عايز ايه

## ليه بنتعلم لغة؟

أكيد عشان نوصل لهدف معين سواء كان وظيفة أو دراسة او منحة و هكذا بالإضافة ان اللغة مجرد أداة مش شياكة ولا وجهة نظر



## في البداية اتعلم انجليزي بريطاني و الا امريكي؟

لا انت تتعلم انجليزي الأول و بعدين ندور سوا على اللهجة ٨٨ هو ينفع تدور عالفرع و انت مش معاك الأصل!!!

بمعنى ان اللهجة كمان مجرد أداة، يعنى مثلا لو انت طبيب هتحتاج تتكلم بريطاني كويس يبقى البريطاني هو أداة أهل مهنتك و لو انت مبرمج بنسبة كبيرة هتحتاج أمريكي و هكذا مش موضوع ايه فيهم اسهل عليك او اقرب لقلبك و معدتك ... لكن عالميا بيتم استخدام حاجة اسمها انجليزي دولي International English في التعاملات بين المؤسسات و الدول و في الوثائق و الكتابة التقنية كمان بعقد انت دلوقتي فهمت من الكلام ان المادة العلمية للنظام دا معتمدة على انجليزي دولي و ابشرك انك فهمت صح لأنك أكيد ما زلت متذكر احنا ليه بنتعلم انجليزي "أداة من أجل هدف ما".

## هل الأفلام بتعلم لغة؟

الإجابة نعم الأفلام و البرامج الحوارية التوك شو و النشرات الإخبارية و الراديو و الكتب المسموعة اه بيعلموا لغة كويس جدا لأنهم بيسمحولك تسمع الانجليزي بتاع التعاملات اليومية و تاخذ المصطلحات و الأساليب اللي على لسان أصحاب اللغة الأصليين.

## هل الاغانى بتعلم لغة؟

علميا لا لأن الاغانى بنسبة كبيرة بتبوظ البناء الصحيح للجمل و الجرامر و أحيانا النطق الصحيح عشان تناسب اللحن او النغم و دا يربى جواك لغة مشوهة كطالب محتاج تبني لغة صحيحة

بالإضافة انى مش هعرض حكم شرعى لكنى شخصيا مقتنع انها حرام و ان العلم هدية من عند ربنا و انا في تعلمى للغة بطلب علم، "و علم الله لا يهدى لعاصي" "وما عند الله لا يبتغى الا بطاعته" و انت ليك الحرية في سماع الاغانى من عدمه لكنها علميا مش بتعلمك لو مبتدى تماما.





## مين أفضل حد بيتعلم لغة؟

لو رحت إنجلترا و قابلت طفل عنده 4 سنوات أكيد هتلاقيه بيكلمك انجليزى كذلك لو رحت روسيا هتلاقي الطفل اللي عنده 4 سنوات بيكلمك روسى قيس الموضوع عالطفل الصينى هيكلمك صيني و المصرى أكيد هيكلمك عربى مش مصري يا ناصح .. و من هنا نستنتج ان الطفل هو افضل متعلم للغة او بصورة أوضح الطريقة اللي ربنا خلق الانسان بيتعلم بيها اللغة هي الأفضل .. و منه يجب تكون على علم ان اللغة هي العلم الوحيد اللي كل البشر بيتعلموه بنفس الأسلوب و بيتقنوه بنفس الدرجة و طبعا في اختلاف في الزمن القياسى لتعلم كل لغة ابحت عنه و اعرف ٨٨

## ازاي بيتعلمها بالسهولة دي؟

ببساطة ربنا خلق الانسان بيكتسب اللغة من و هو جنين بمراحل خيلنا نتعرف عليهم: **أولا الاستماع:** واحدة من أوائل الحواس اللي بتشتغل من الشهر الخامس عند الجنين هي السمع و يستمر يسمع فقط لعمر 6 او 9 شهور لتبدأ بعدها مرحلة النطق و محاولاته

**ثانيا التحدث:** عند سن 18 شهر بيقدر يتكلم بشكل أفضل لكن في شرطين بيوصلوه للمرحلة دي:

1. الاستماع المستمر المتكرر: يعنى بيسمع كل يوم و بيتكرر الاستماع على ودانه كثير جدا لنفس الكلام.
2. التحفيز و الهدف : في بداية نطق الطفل بيبدأ أفراد الاسرة بتحفيظه بانهم بيفرحوا انه نطق و بدأ يقول و لو نص كلمة زى ما او دا و يحاولوا يلاعبوه و يظهروا ادامة فرحهم بنطقه للشئ البسيط دا و من هنا هو بيحاول ينطق أكثر لأنهم هيلعبوه و يفرحوه أكثر و بالتالى هو هنا بييسعى لهدف انه يبقى سعيد طول الوقت و الوسيلة هي انه يحاول ينطق فيحصل على هدفه غير مدرك انه بكدا بيطور قدرته على الكلام مع استمرار عملية الاستماع و تكرارها في نفس الوقت و من هنا لازم تعرف انك عشان تستمر لازم تربط تعلمك للغة بهدف يساعدك تكمل عشانه و تسيبك من حجة الظروف و انك حالتك خاصة عن كل البشر و الشماغات الكثير دي.

الجزئية دي بتوضحك ان اللغة مبتجيش في يوم و ليلة عشان في ناس بعد أسبوعين من بداية كورس او نظام تعليمى بتقول انا بقالى اسبوعيين بحالهم و لسه مبقتش أتكلم زى الأجانب .. محدش بيبدأ سوبر لكن في حد بيبدأ و يحاول و يستمر و يوصل بالمجهود و الصبر .. متستعجلش على النتائج لأنك مش هتلمس تغيير ظاهر حقيقى الا بعد شهر و نص او شهرين



بالإضافة ان الجزئية دي بتوضح ان الاستماع بيحافظ على وجود اللغة و بيعلى معدل الفهم ، بينما التحدث و محاولات التحدث بيطور اللغة و يساعد على بنائها بشكل مستمر عشان في ناس كتير بتخلص الكورسات و بعدها ب 4 شهور يقول انا نسيت اللغة عشان مش لاقى حد أتكلم و امارس اللغة معاه و وقتى مضغوط و مشاغلى الخ الخ .. المشكلة هنا مش اللي قالها المشكلة انه لسه ما اتعلمش بأسلوب يحافظ على قوة لغته و يعلمه ازاى يخليها تستمر معاه زى ما انت هتستمر معاك اذا اتبعت تعليمات الكتيب اللي انت بتقرأه دلوقتى كلها.

و بناء عليه يجب ان تتأكد ان أى نظام تعليمى للغة غير قائم على الاستماع المستمر المتكرر هو فاشل من الدرجة الأولى و إهدار لوقت و مال المتعلم مهما نجح فى ابهاره.





# WHAT?

## طب اعمل ايه؟!!!

ركز هنا عشان دي الخطوات اللي انت هتفدها بالترتيب:

**أولاً:** تسمع كل درس من 20 ل 30 مرة او اكثر و دا أحسن حسب وقتك و طاقتك  
تسمع العدد دا عشان تحقق التكرار اللازم لتثبيت اللغة في ذاكرتك طويلة المدى او  
اللاوعي او الذاكرة الدائمة

يبقى تفهم هنا ان الغرض من التكرار التثبيت مش الفهم عشان في حد ناصح هيقولى  
مهو انا فهمت من اول او تانى مرة ايه داعى انى اكرر كثير كدا

**ثانياً:** تسمع ساعة يومياً على الأقل عشان تحقق مبدأ الاستمرار و اعرف انه لو حتى  
نص ساعة يومياً أفضل من 4 ساعات أسبوعياً "الاستمرار يا ريس"

**ثالثاً:** لو انت لسه مستواك صفر و بتسأل نفسك ازاي اسمع 30 مرة للدرس و ساعة  
يومياً و انا أصلاً مش بفهم حاجة لما بسمع  
الحل انك تقرأ النص اللي بتسمعه من ملف ال PDF الموجود في المادة العلمية مع كل  
درس

يبقى هتبقى سامع و عينك مع الكتابة و عارف ان الكلمة اللي اداك دي هي اللي  
بتسمعه دلوقتي و دا هيعلى من معدل فهمك بحيث انك دلوقتي بتستخدم حاستين  
"السمع و البصر" مع بعض مش حاسة واحدة "السمع" في عملية التعلم

**رابعاً:** لو بتقابلك كلمات جديدة مش فاهم معناها و بالتأكيد انت محتاج تحفظ كلمات  
يبقى الحل ايه؟

ببساطة اعمل كراسة صغيرة كدا هنسميها قاموسك الشخصى و اكتب فيها الكلمات  
كعبارات قصيرة "Phrases" و دا يعتبر أقوى أسلوب تحفظ بيه الكلمات لأنك عن  
طريقه هتحل مشكلة:

التحدث و الكتابة بقواعد صحيحة "Grammar"

و بناء الجمل لو انت من الناس اللي بتسمع تفهم و مبتقدرش ترد بالانجليزى  
و بتسمى عندك ازاي تفكر بالانجليزى و تتخلص من التفكير في الانجليزى .. تفكر في  
الانجليزى يعنى تفكر بالعربى و تترجمة في دماغك لانجليزى و تفضل تدور عالكمات  
الدالة عالزمن و في الآخر تتخرج تتكلم خوفاً من ان الناس ممكن تضحك عليك او تظهر  
أقل منهم

العبارات القصيرة لازم تكون من النص الأصلي اللي استخرجت منه الكلمة الجديدة مش  
من دماغك و تكون 4 او 5 كلمات بالكثير جدا من الكلمات اللي حوالين الكلمة الجديدة  
عليك و دا هيفيدك في مجال عملك و في ربط الكلمات باغراض استخدامها.



## انفذ ازاي؟!!!

طبعا كيفية عمل الشئ هيسهل عليك كثير جدا لأبعد الحدود و باختصار  
تعالى نفهم هنفذ ازاي:

### أولاً: قسمهم

يعنى ال 30 مرة استماع اللى قلتهم فوق هلاقى ناس بتقول انا مشغول و عندى حاجات  
كثير و كل واحد هيحكى ظروفه .. الصح انك تقسمهم عشان متحسش انهم تقال عليك  
.. يعنى اسمع مثلا 10 مرات الصبح و 10 الظهر و 5 العصر و 10 آخر اليوم و 10  
قبل ماتنام هتلاقى انك عدت ال 40 مرة مستريح و محسنتش بضغط عليك.

### ثانياً: ظروفك المتاحة فقط تكفيك

مثلا ظروفك المادية يعنى مش شرط تشتري موبايل بآلاف عشان تسمع عليه .. يكفيك  
لو حتى MP3 Player صغير او موبايل بيتحط فيه كارت ميمورى حتى لو نوكيا أبو  
200 جنية الصغير دا

ظروفك الاجتماعية يعنى متتججش بانك بتجيب طلبات البيت كله او بتشتغل لوقت  
متأخر او عليكى شغل البيت و الطبخ و الغسيل و الحاجات الكثير دى او اخواتك  
بيجيبوا عيالهم يقعدوا على كتافك و بيكتفوك .. يكفيك حته سماعة في ودانك و شاشة  
موبايل تعرض عليها ال PDF اثناء الاستماع و لو موبايلك مش تاتش اطبع الملف  
بشوية فكة عند أقرب مكتب طباعة و امسك ورق في ايدك المهم متخليش حاجة توقعك  
و مش شرط تكون مركز مع كل مرات الاستماع.

اعرف ان كل واحد لغته بقت قوية هو زيك عنده ظروف لكن في ناس بتتججج و تفضل  
تشتكى و في ناس بتتحرك و تتكيف مع الوضع و تتقدم و تصنع قصص نجاح تصدعنا  
بيها بعدين .. بالمناسبة الصداع مالنوع دا حلو و الكل بيحبه .. فرفشنا يا ببلاوى ٨٨

### ثالثاً: استمع في وقت فراغك فقط

يعنى متخصصش وقت للاستماع و تخنق يومك اكثر ماهو مخنوق .. اسمع في  
المواصلات و دى مش أقل من ساعة من يومك .. اسمع في طوابير الحكومة او شؤون  
الطلاب و دى كفيلة تحضر فيها دكتوراة في اللغة .. اسمع قبل و بعد الوجبات ..  
الصبح بدرى و قبل ما تنام .. بين المهام و في بريك الشغل .. اصله مش من الذكاء  
انى انصحك تخصص وقت لتعلم اللغة

عمرك سمعت عن واحد مصري بيخصص وقت يقوى فيه العربى اللى بيتكلمه؟!!! طب  
انت نفسك بتعمل كدا؟!!!



يبقى خلى الموضوع طبيعى و بسيط عشان تحبه و تستمر و اعتبره زى الجرنال اللى بتشتريه و تقرأه تتسلى بيه .. اتسلى باللغة و متبقاش رخم و تقول مبشتريش جرايد >\_<

### رابعاً: نظم و رتب

يعنى اشتغل بترتيب الملفات الموجودين في المادة العلمية و بلاش فهلوة و اكتشاف هنا.. يعنى لو مثلاً 5 دروس اسمع الأول 30 ثم التانى 30 ثم التالت و هكذا و افكر انك بكدا بتحافظ على ثروة تركيزك لأن التركيز ثروة يجب علينا نديرها صح زى ما بنتعلم إدارة الأموال و إدارة الوقت فبلاش تشتت نفسك .. بالإضافة انك لو طاقتك عالية و حابب تزود في يوم مجهود عالغة؛ زود عدد مرات استماع نفس الدرس و مياخذكش الفضول تدخل عالى بعده.



### خامساً: ماتشبعش Stay Hungry

يعنى لما تيجى تسمع و تكمل 10 مرات او 20 مرة متقولش كفاية كدا و اتعشت و انا بقيت برنس و حفظتها خلاص .. كمل عالأقل 30 و اعرف انك اول ما تحس انك بقيت جامد أوى انت كدا ابتديت تفشل و تتغر و دا طريق اللاعودة لتقدمك و علمك.

### سادساً: على صوتك Use Your Voice

و دى أهم نقطة في الكلام كله .. يعنى توظف صوتك لأن ناس كتير بتنسى اللغة و بتهملها بحجة ان مفيش حد تمارس معاه و تتكلم معاه .. طريقتين سهلين جدا .. "بفكرك تانى عشان تبقى عارف الهدف من اللى هتعمله هنا" : **أولهم انك تكرر بصوتك** ورا ملف الاستماع في آخر كام مرة في ال 30 .. فإيدته في انك هتحسن النطق لأنك دلوقتى بتقلد حد لغته الاصلية انجليزى فأكيد بينطق صح بالإضافة انه هيزود جرأتك عالكلام بالانجلش

**ثانيهم انك تسجل لنفسك** المقطع اللى سمعته بعد انتهاء ال 30 كذلك ..

سجل بصوتك من النص اللى في ال PDF و دا هيسمحك تقارن بين تسجيلك و ملف الاستماع الاصلى .. كل اما تلاقى فروقات و اختلافات بين تسجيلك و الاستماع الاصلى سجل تانى و قلده بالملى بالظبط و بكدا تبقى قدرت تقيم نفسك و تعرف أخطائك و تطور من نفسك لو حتى مبتخرجش تشوف ناس تماما.





## محتاج افهم اكثر!




1. انت بكدا اتعلمت كل المهارات الرئيسية و الفرعية بحيث انك بالفعل استمعت، نطقت، اتكلمت، قرأت، كتبت و حفظت كلمات كمان .. **النظام كامل** و مش محتاج حاجة جنبه لو السؤال دا في دماغك دلوقتي بالإضافة انك لو بتسأل نفسك ابدأ منين ؟ في الكتيب دا تعليمات و مادة علمية .. بتنفذ التعليمات باستخدام المادة العلمية الأنسب ليك من رقم 3.

## 2. جنرال والا محادثة:

ربنا خلق الانسان بيتعلم اللغة بالطريقة البسيطة اللى قولناها فوق عند الطفل الصغير مقسمهاش في الاكتساب للتعقيدات دي و معظم الناس اللى بتقتنع انه لازم 6 مستويات جنرال و 6 محادثة مش بيتعلموا اى حاجة و بيهدروا وقت و فلوس عالقاضي .. لما حد بيسألني الكلام دا جنرال و الا محادثة؟ بقوله انجليزى و بس لأن المهارات بتتكامل و لازم تتعلمهم كلهم

مهارات استقبالية : الاستماع و القراءة  
مهارات إنتاجية: التحدث و الكتابة  
مهارات فرعية: النطق و القواعد و المفردات



## 3. المادة العلمية:

أكيد بتسأل نفسك طول الوقت هي فين الملفات او المادة العلمية اللى هنفذ بيها التعليمات دي كلها .. ليك طريقين:

**اولهم Effortless** : ابدأ فيها بفولدر اسمه Listen First و دا جواه سبع دروس المفترض انك تخلصهم في اول 7 أيام لكل يوم درس يعنى تبدأ بيهم و تقدر تحملهم من هنا:

## ListenFirst

ثم الفولدر التانى اللى اسمه Original English و من هنا يبدأ اللعب الصح .. اما تدخل جواه هتلاقى ملف صغير هيساعدك كتير بس نصيحة بلاش تحاول تقرأه قبل ما تخلص Listen First و الفولدر دا يتحمل من هنا:

## OriginalEnglish





**ثانيهم** [www.esl-lab.com](http://www.esl-lab.com) : و دا موقع شامل في الاستماع بيناسب كل المستويات بحيث لو انت صفر ابدأ بتانى جدول هتقابله في الموقع .. لو طالب كلية عملية او مستواك متوسط ابدأ بأول جدول في الموقع .. لو مستواك عالي يبقى تالت جدول انسب حاجة ليك كل دروس الموقع لما تفتحهم هتلاقى فوق في اول الصفحة بتاعتهم كلمة Quiz Script و دى عن طريقها تقدر تشوف النص بتاع الاستماع و انت بتسمع

ملحوظة إضافية ان الاستماع اللي في الموقع او Effortless مدته قصيرة و مش مملين و متنوعين بحيث تفهم انجلش في نواحي الحياة المختلفة ككلمات و أساليب تعبير و تعامل و مصطلحات متخصصة أحيانا واحد هنا هيسألنى و يقول يا كابتن لطيف انا اتلخبطت يعنى احمل الماتريل و الا اشتغل من الموقع!!؟

حمل الماتريل و ابدأ بيها من النهارده .. الموقع هو أنسب ليك لو هتبدأ بالصفر و كمان بينفع لزيادة الاستماع لو لغتك حلوة .. و هو بديل عن الماتريل في حالة العجز عن تحميلها نصيحة لله لو اى لينك ما فتش معاك جرب جهاز تانى او متصفح مختلف حاول تتصرف عشان تستفيد.

#### 4. البرشته يا ريس "مش عارف اكتبها انجلش دى"

ببساطة حاول تتكلم انجلش و تمارس بكل السبل المتاحة .. يعنى مثلا يوم مفتوح للانجلش انزل و شارك لأن معظم اللي هناك لغتهم زيك قليلة و حابين يطوروها و مش عيب انك تغط محدش هيضحك عليك بالعكس هيدعموك - فريق تطوعى تخصصه انجلش .. انزل رسالة أقرب فرع ليك هتلاقى كورسات انجلش مجانية برشت عليها و اتعلم و "التزم" يخيلك نضارتك . لو حد بيتكلم انجلش في الشارع أتكلم معاه .. لو صاحبك يفهم انجلش متروحوش كل دماغه بالانجلش .. ادخل مواقع بتعمل محادثات زى Verbling مثلا .. مش هتحس بقيمة الكلمتين دول الا لو بطلت خوف و كسوف و جربتهم وافكر دايمًا "You shy, You die"







## .5 : Study Block

الكلمة دي معناها بالبلدى الفتور أو التوقف أو ان روحك تقل من ناحية التعلم و تبقى مش عايز تكمل و دي بتيجي تلقائيا بعد شهر من البداية لو بمعدل طبيعى و ممكن بعد أسبوعين لو ضغطت على نفسك زيادة عن اللزوم في تطبيق النظام .. بالمناسبة هي حاجة طبيعية جدا لكن لا بد انك تكون مدرك انها عاجلا ام آجلا هتجيك .. افكر من البداية انك رابط تعلمك بشئ واضح هتوصله لو اتحسنت في اللغة عشان تتحفز تكمل .. و متغضبش من وجودك في المرحلة دي لكن دلوقتي قلل جهدك للربع أو اقل من الربع المهم انك متستسلمش و تتوقف فيحصل انقطاع .. قلل معدل الاستماع لكن اياك و الانقطاع تحت أي ظرف .. **الفارس يغير موقعه ولا يترك المعركة** نصيحة إضافية: استعن بصحبة صالحة تعينك يعنى ناس نشيطة و بتاعة شغل تدفعك مثلا أصدقاء الدفعة أو أعضاء عمل تطوعى.



## .6 : Make it Fun

خلى الموضوع مسلى بأفكار كثير حلوة منها انك تربط الكلمات الجديدة بحركات تعملها بلغة الجسد أو بتعبيرات الوجه و هكذا منها انك تجيب من جوجل أسماء كل حاجة في شقتك و تلرز لمدة شهر أسماء الحاجات عليها بورق استيكر أو ورق و لرزق و الشهر التالى تلرز على نفس الحاجات جمل قصيرة و تتعمد تقول الحاجات دي بصوتك كل اما تحتك بحاجة ملزوق عليها اسمها او جملة عنها "طريقة عبقرية دي" منها انك ترسم رسومات تعبر عن الكلمات حتى لو الرسم مش هوايتك و هتشخبط بالألوان <جربها هتلاقيها ممتعة منها انك تسمع أفلام و تحاول تسأل نفسك اسألة عن الاحداث اللى فيه بالانجلش .. و انك تخلق موبايلك و حساب الفيسبوك بالانجلش ٨٨ منها انك تحاول تعمل قصص قصيرة باستخدام الكلمات الجديدة عليك في الاستماع و تصدع اصحابك بيها عشان يحبطوك قصدى يقيموك.





## 7. الأطفال

لو النظام دا وقع في ايد ام او حد حب يعلم بيه  
أطفال .. النصيحة تعمل كل حاجة فيه ما عدا انها

هتشغلهم من [esl-lab.com](http://esl-lab.com) من تانى جدول اللى قلنا عليه بتاع المبتدئين و  
يكون بمعدل درسين في الأسبوع بالردود بتاعتهم و دي هتفهم معناها لما تفتح  
الموقع و تفتح ال Quiz Script بتاع دروس **تانى جدول بالاخص** و تبدأ  
تخليهم يمثلوا الموقف و يحفظوا الجمل بتاعته بالتكرار و المكافئة و اسمحلهم  
يقرأوا و يغلطوا و حفزهم يكملوا .. و تقدر كمان تجيب لهم قناة ميكي يرددوا  
وراها الحروف و أسماء الحاجات .. مسلية جدا و انا نفسى بتفرج عليها ٨٨  
احنا مش هنبطل كرتون لما نكبر .. احنا هنكبر لما نبطله ٨٨

## 8.

**الصين و الهند** مجموع سكانهم على بعض حوالى نص سكان الكرة  
الأرضية و بالتالى اكثر من كل سكان أمريكا و إنجلترا مع بعض بالإضافة ان  
الدولتين لغتهم الثانية بعد الرسمية اللغة الإنجليزية و خلىنى اضيف انها  
رسمية في الهند و دا لا يعنى انها اللغة الاصلية لأهل البلد  
يعنى فيما معناه ان اكثر من 90% من اللى هتقابلهم بيتكلموا انجلش مش  
امريكان و مش بريطانيين فمتعشب نفسك باللهجة بدرى .. اتعلم اللغة زى  
العجينة الخام بالطريقة ال international الدولية اللى في المادة العلمية و  
تقدر بعد كدا تشكل العجينة دي لأى لهجة تانية تحتاجها حسب طريقك و  
اهدافك.

## 9. حطم اصنام عقلك:

بمعنى ان الكلام اللى هنا مبنى على ابحاثى و دراساتى  
و تجاربى و خبراتى في الشرح و الإدارة .. يعنى انت تقدر  
تضيف للنظام خبرتك و أفكارك لأنك أكيد بتقدر تفهم و  
تقيم و تبديع أحسن منى بشكل مختلف .. طول ما  
الكلام مش من قرآن او كتاب سماوى يبقى قابل  
للتغيير و بالإضافة .. مش شرط تقفل اللعبة.



أيام الامتحانات عند المصريين صنم قديم لسه محدش كسره لا بالعكس بندعم  
بنائه بشده باننا بندير وقتنا و اولوياتنا غلط و نتدلع طول السنة و نيحى  
عالامتحانات نسيب اللغة و الاستماع بحجة ضغط الامتحانات .. مش هنصحك  
تذاكر كل حاجة أول بأول عشان دا الصبح و انت عارف انه الصبح و بتخالف



بس هل في نفس الأيام دي بتبطل كلام بالعربي؟! أكيد لا .. يبقى الحل انك في أيام امتحاناتك تقلل جهدك تماما بس متقطعش .. يعنى كل يوم الصبح عامل الاستماع معاملة الجورنال .. اصحى اسمع مرة واحدة لدرس مختلف كأنك صحيت فتحت الشباك و قلت صباح الفل لعم محمد اللي بيشرب الشاي في البلكونه ادامك .. الموضوع بياخد منك دقيقتين بس لو عملت كذا من موقع [esl-lab.com](http://esl-lab.com) و دي استراتيجية الوقت الحرج

## 10. شهادتى معتمدة و موثقة

لازم تتأكد ان العمل و الشركات لا تعترف بأى شهادات لغة تماما غير المعايير الدولية اللي زى التوفل TOEFL و الايلتس IELTS و غيرهم كثير و دول بتحضرلهم و تمتحنهم عند الاحتياج ليهم فقط و بتكون ليهم مدة صلاحية بعدها تمتحن تانى اذا احتجتهم تانى. يعنى متجريش ورا الاعتمادات و لا تتخدع بالمسميات لأن معظمها نصب و أسماء براقعة للجذب كعامل تسويقى مش أكثر



و التوثيق بتاع الخارجية هتحتاجه لو انت مسافر فقط و بيكون على الشهادات المعتمدة محليا في دولتك اعتماد حكومي معترف بيه زى شهادة التخرج مثلا .. و مكاتب الكورسات بتجيبيه بفلوس و تدفعك عليه كثير عشان انت بتحب تدفع زى الباشا.

## 11. الطلاقة او الفصاحة Fluency :

دايما لما بنسمع الكلمة دي بنفكر انها بتطلق على الانسان اللي عدى كل مراحل اللعبة بالنسبة للغة .. بمعنى انه بيتكلم بسرعة البرق و عارف كل الكلمات و معدى ال 12 مستوى اللي بيقولوا عليهم .. طبعا الموضوع ابسط من كل دا ..

باختصار شديد معناها الوضوح في توصيل الرسالة فقط .. يعنى تكلم الناس بألفاظ سهلة و بسيطة توصل المعنى بتاع الكلام بصورة سليمة مش أكثر يعنى مش شرط تكون عارف كل الكلمات التقنية الطويلة الدقيقة اوى بالنسبة لكل معنى .. يعنى ممكن تكون مبتدئ Fluent و ممكن تبقى لغتك قوية و مش Fluent عشان لغتك صعبة عالناس و بناء عليه لازم تتأكد ان اللغة مجرد أداة تواصل مش أداة استعراض ..









## 14. ليس هناك مكون سرى:

النظام دا عمل لوجه الله و متاح انك تعلمه و تشرحه لغيرك و تفيد بيه أي حد ممكن يستفيد منه .. قوته أعلى من أي نظام تعليمي في المؤسسات المعروفة و المشهورة سواء كنت بتدفع فيها كتير أو قليل يعني مش عشان مجاني يبقى ضعيف .. من حق الكل يتعلم بجودة عالية سواء قدر يدفع أو مقدرش .. باتباعك للنظام التعليمي دا تقدر في خلال 6 شهور تتقن اللغة بحيث انك تقدر تتأهل بعدها لأعلى اختبارات زى التوفل TOEFL و الايلتس IELTS ..

الهدف الرئيسي من صناعة النظام دا بالأسلوب اللي شوفته هو انك تتعلم اللغة بأسلوب يمنعك من نسيانها مرة ثانية و تبنيتها في عقلك بنفس القوة اللي بتبنى بيها عضلة في جسمك بالتدريب المستمر المتكرر لأن اللغة شيء مستمر معاك مش علم أكاديمي بتنتهي دراسته بامتحان أو شهادة.

بإضافة انك لو لقيت الدرس صعب شوية و فيه كلمات جديدة اعرف انك كدا بتتعلم جديد و ان دا الصح .. لو كل اللي بتتعلمه سهل و انت أصلا عارفه يبقى فين الإضافة!!

.. أخيرا احب أوضح ان النظام دا تقدر تتعلم بيه أي لغة ثانية لأنه قائم على الأسلوب الطبيعي اللي ربنا خلق الناس بيكتسبوا بيه لغتهم الأصلية و زى ما وضحت في البداية ان الجميع بيتعلم اللغة الأم بنفس الأسلوب مفيش اختلاف بالتوفيق لحامله و ناقله.

*Waleed Essam*

*Instructional Designer and Developer*

01282124090

walidessam@outlook.com

[Facebook /walidessam0](https://www.facebook.com/walidessam0)

[LinkedIn /walidessam0](https://www.linkedin.com/company/walidessam0)

[bit.ly/walidessam](https://bit.ly/walidessam)

